

PARTIDU POPULARARRAK ONARTU DU LEGEBILTZARRAK EZARRI ZITUEN IRIZPIDEAK ERRESPETATZEA

PPk eta EAJk hitzartu dute Estatutua garatzea Kongresuan laguntzearen truke

■ Apirilean inbestidurako konpromezuak beteko ditu Jose Maria Aznarren Gobernuak, eta gero bigarren faseari hasiera emango diote, hau da, Gernikako Estatutuaren garapenaren aroari. Baketze politikan bi alderdien jokabideak oso urrun daudela eta, desadostasunak «diskrezioz» zehaztea ebatzi dute.

Felix Iriarte / Gasteiz

JELTZALEEN eta popularren arteko krisia bideratuta geratu da Moncloako jauregian Francisco Alvarez Cascos eta Jose Maria Aznar Xabier Arzalluz eta Jose Antonio Ardanzarekin bildu ondoren. Bilerak astelehen gaua sartu arte iraun zuen, eta atzo han gertatutakoaz hitz egin zuten EAJko eta PPko buruzagiek.


Ardanzak luzeen hitz egin zuen. Gobernu Kontseiluaren ondorengo prentsaurrekoa aprobetxatu zuen xehetasunak eskaitzeko. Esan zuen gertatutakoa «logikoa» izan zela, «bi aldeek egoera berbideratzeko borondatea» zutelako. Elkar ulertzeko oinarriak bi dira: inbestidurako konpromezuak betetzea, eta Estatutuaren garapena.

Lehen aipirilean bete beharko du Aznarren gobernuak, bigarren faseari ekiteko, eta honek legegintzaldiaren geroa baldintzatuko du. PPk EAJren laguntza eskuratuko du Kongresuan, Estatutua garatzen duen neurri berean. Bileran, beraz, ez zuten egutegia zehaztu, ezta zeintzuk izango diren lehen transferentziak. Bakarrik, PPk hitza eman zuen Legebiltzarrak 1995eko urrian transferentzien traspasoak egiteko zehaztu zituen irizpideak errespetatuko dituela. Sistema honekin epeak eta transferentzia zehatzak hitzartuko dituzte bi aldeek.

Denborak esango du asmatu duten bidea egokia den. Aznarrek, bederen, uste du asko aurreratu zutela bileran. «Bilera oso positiboa izan da, legegintzaldirako egonkortasun markoa finkatuta baitago», esan zuen, eta erantsi ezadostasunak dauden gaietan ere ahaleginak egingo dituztela jarrerak hurbiltzeko.

Jaime Mayor Oreja Barne ministroak eta Carlos Iturgaitz EAEn PPko lehendakariak antzerako adierazpenak egin zituzten. «Bilerak balio badu giroa hobetzeko eta gehiengoa sendotzeko, positiboa izango da», adierazi zuen ministroak. Iturgaitzek, berriaz, esan zuen PPk «beti» bilatu dituela «adostasun eszenarioak».

Konzertu Ekonomikoan EAJren irizpideak onartu ditu PPk • Estatutua garatzeko falta diren 41 transferentzietaz hitz egiten hasi aurretik, hala ere, Aznarren inbestisurarako hitzartu zituzten konpromezuak bete beharko ditu PPk. Ardanzak esan zuen otsaila arte negoziazioak bide onetik joan zirela, baina «geldiunea» izan zela orduan. Martxoarako iragarri zituzten Konzertu Ekonomikoaren Legearen aldaketa, Kupoaren Legea, Langile Etengabeko Hezike-



Jose Antonio Ardanzak Jaurilaritzaren bileraren ostean azaldu zuen akordioaren nondik norakoak.

JOSEBA OLALDE

ta, jeltzaleek galdutako ondarearen berreskuratzea eta Euskaltel bigarren operadorea izan dadin baimena apirilean emango ditu Aznarren alderdiak.

Lehendakariak aipatu zuen

geldiunea Kupoaren Legeak sortu zuen. Izan ere, PPk nahi zuen EAEk ordaindu behar diona kalkulatzeko sistema aldatzea, kupo «negatiboa» zelakoan. EAEk Madrili ordaintzen dio transferitu

ez dituen eskuduntzen truke, zerbitzu horiek Madrilgo Administrazioak eskaintzen dituelako. Eta dirua kalkulatzeko arlo bakoitzean Estatuak gastatzen duenari %6,24 aplikatzen zaio, hori baita EAeri dagokion kuota. Kuota hori aldatu nahi zuen PPk, jeltzaleen irizpidearen aurka. baina, azkenean, amore eman du alderdi popularrak. «Kuota aldatu nahi izateak hitzarmena eragotziko lukeela jakinarazi ge-

nien, eta PPk onartu egin zuen», esan zuen Ardanzak.

Datozen bost urtetan, beraz, ez dira aldatuko kupo ordaintzeko irizpideak. Hau bederatzigarren Konzertua izango da, eta honen amaieran beste Lege bat hitzartu beharko dute Gasteiz eta Madril, 2.001. urtean.

Biolentziaren gaia ere jorratu zuten Moncloan bildutako agintariek. Gaiak are gehiago okertu ditu bi alderdien arteko harremanak, eta bideratzen saiatzea ezinbestekoa zen. Ardanzak eta Arzalluzek egindakoa zehaztu zuten. Arzalluzek honako hau komentatu zuen Radio Euskadin goizeko elkarrizketan: «Osotasunean hartuta, ez gaude hain urrun, nahiz eta puntu jakin batzuetan ez garen ados jarriko. Ezadostasunak ditugu, baina horiek bide emateko formula asmatu dugu, ezadostasun horiek ez dezaten nahi ez ditugun ondorioak ekarri».

Ardanzak, ildo beretik, esan zuen «oso zaila» dela alderdi espainolista batekin baketze politikan bat etortzea, eta adibide gisa, Jaurilaritza jarri zuen, non ez dago akordiorik alderdi sozialistarekin. Lehendakariaren arabera, «diskrezioz» ezadostasunak aztertuko dituzte, eta eztabaidak ika-mika ekarriko balu, hori bideratzen saiatzea derrigorrezkotzat jo zuen. «Denbora asko beharko dugu gai honen inguruan adostasunak lortu ahal izateko», erantsi zuen lehendakariak. X

«Ez da gobernu krisirik izango»

JAURLARITZAKO alderdien arteko harremanez hitz egiteko aprobetxatu zuen Jose Antonio Ardanzak prentsaren aurreko agerraldia. Azken egunotan hainbat iritzi agertu dira, gehienak krisia ukatzeko, eta Ardanzak ildo beretik jo zuen. «Ez dago krisirik, baina alderdietako kideei esango nieke ez sakontzeko ezadostasunetan», esan zuen, joan den ostiralean adierazitakoa berretsiz.

PSE-EEren eta EAJ-EAren arteko desadostasunak baketze politikaren haritik etorri dira. Sozialistek uste dute Jaurilaritzako alderdi abertzaleen jokabidea ez dela zuzena, eta aldatzeko eskatu diote, batez ere Fernando Buesak, zeinek, Legebiltzarrean lehenengo eta kazetariei egindako adierazpenetan gero, esan baitu biolentziaren gain ez dagoela erdibiderik. «Edo biolentoekin edo demokratekin, ez dago beste biderik», esan du beste alderdiei bidea erakutsi nahian.

Buesaren adierazpenek ez dute kolokan jarriko Jaurilaritzaren eraketa. Ardanzak krisia baztertu zuen: «Baketze politika alderdi espainolista batekin hitzartzea oso zaila da. Gai hori, izan ere, gobernu hitzarmenetik at utzi genuen, eta gai horiei buruz ezin dizkiet kontuak eskatu; baina gobernu koalizioan hitzatutako gaietan ez dago ezadostasunik, eta ez da krisirik izango».

Krisia, izatekotan, beraz, Jaurilaritzako hitzarmenen inguruan izango da. Eta Konzertu Ekonomikoaren Legeak horretarako parada eman lezake. Sozialistek adierazi dute legearen aurka bozkatzeko dutela Kongresuan, eta hori ez luke gustura hartuko EAJk. Ardanzak, badaezpada, gauzak bere lekuan utzi nahi izan zituen atzo. «PSOeri joan den azaroan aipatu nizkion Konzertu Ekonomikoaren aurka egoteak dituen arriskuak. Orain ez dut besterik esango, gauzak ez nahasteko eta sozialistek ez dezaten txantaje modura hartu. Hala ere, ez dut ametituko mugimendu arrarorik, baina Jaurilaritzan ez da krisirik izango», esan zuen. Konzertuaren aurka egoteak dituen arriskuak Ramon Jauregiri esan zizkion, hau da ez diola onartuko jakinarazi zion.

Jose Maria Aznar:

«Bilera oso positiboa izan da, legegintzaldirako egonkortasuna finkatuta baitago»

Jaime Mayor Oreja:

«Bilerak balio badu giroa hobetzeko eta gehiengoa sendotzeko, onuragarria izango da»

Xabier Arzalluz:

«Osotasunean hartuta, ez gaude hain urrun, nahiz eta puntu jakin batzuetan ez garen ados jarriko. Hala ere, ezadostasun horiei bide emateko formulak asmatu ditugu»